

Hopi interes for di PARA Gobierno ta encurasha Nelson English pa introduci su inversionistanan



ORANJESTAD (AAN): Minister Mike de Meza a expresa den un entrevista cu gobierno ta contento cu e interes for di e organizacion nobo PARA cu ta boga pa re-apertura di e refineria, algo cu gobierno tambe ta boga p'e.

El a agrega cu ta asina cu e comision di gobierno tambe a cuminsa traha caba riba un ultimo intento pa logra haya un cumprado of operador nobo pa e refineria. E miembronan di e comision no ta worde paga pa nan trabao, pero lo haya ora y si ta necesario gastonan por ehempel di viahe paga, pero no ta e intencion pa haci ningun estudio adicional mas, fuera di tur e estudionan grandi y extenso cu ya a worde haci caba.

Si un inversionista ta interesa den e refineria e mes tin cu haci su "due diligence" y "due processing" como parti di su proceso pa yega na un acuerdo cu Valero, pero gobierno no lo ta invertiendo den ningun estudio.

Normalmente e inversionista mes kier haci su investigacion, De Meza a remarca. E proceso cu un eventual inversionista/cumprado ta haci ta inclui screening, negociacion, dialogo, inspeccion visual,

evaluacion di datonan y cifranan, investigacion di scenarionan posibel, etc.

Companianan den e mundo di petrolio sa kico ta un refineria, e parti economico, mecanico, electrico, di instrumentonan, logistica, dinamica di mercado di crudo y produccion, y tur otro detaye. De Meza a subraya. Por tin 100 diferente estudio, pero na fin di dia cada experto como inversionista mes ta wak si loke tin riba mesa ta cuadra cu realidad, el a añadi.

Minister De Meza a bisa cu el a acerca Nelson English for di basta tempo pasa y a hasta bishit'e y a hiba diferente combersacion cune. El a puntra English si e conoce cualkier inversionista y pa e busca entre su contactonan si acaso tin interes pa haci un evaluacion di refineria na Aruba.

"Nos no a busca sr. English pa bin encabesa un otro comision na Aruba. Nos a papia hopi cla cu sr. English. Sr. English tin su experticio. E por yuda den esaki door di bin cu e hendenan," De Meza a bisa. "Mi no ta kere cu ta necesario pa haci tur otro tipo di estudio. Tur tipo di estudio riba esaki a worde haci caba,"

el a subraya. E mandatario a remarca cu de facto el a manda tur e informacion pa English tambe y como experto y un persona cu conoce e refineria di Aruba bon e sa kico e tin na e informacion aki, segun e minister.

"Sie por haya inversionistanan cu ta interesa pa bin evalua, haci un estudio, e ta liber pa haci esaki," el a expresa.

"Mi kier a bisa tur hende, nos

ta contento cu e organizacion di PARA cu tambe tin su preocupacion, tambe ta willing di contribui na posibilidadnan, nos ta aprecia esaki hopi, pero mi ta garantisa bo cu nan tambe, nan lo haya sa tambe, nan lo mira ta con compleho esaki ta, con dificil e ta," De Meza a bisa. El a agrega cu pa papia ta "uno", pero pa bin cu e inversionistanan cu ta "willing, able y capable"

pa pone cientos di miyones di Dollar den rehabilitacion di refineria y opera e refineria no ta un cos facil, e ta hopi mas dificil cu hopi hende ta kere.

E mandatario a pidi pa tur persona cu ta sigur cu tin un expert cu tin business cases pa bin parti na porta di gobierno pa papia, pero gobierno no ta bay tene su mes bezig cu un otro sorto di investigacion.